

N A C R T

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na ___ sjednici, održanoj ____2017. godine, d o n o s i

ZAKON O KANTONALNOM TUŽILAŠTVU ZENIČKO-DOBOJSKOG KANTONA

DIO PRVI - OPĆE ODREDBE

Član 1 . (Predmet)

Ovim Zakonom uređuju se pojam, opšte nadležnosti i funkcije Kantonalnog tužilaštva Zeničko-dobojskog kantona (u daljem tekstu: Tužilaštvo), organizacija, rad, izvještavanje, unutrašnja organizacija i finansiranje Tužilaštva.

Član 2. (Kantonalno tužilaštvo)

Tužilaštvo je samostalno državno tijelo koje, u okviru prava i dužnosti Zeničko-dobojskog kantona (u daljem tekstu: Kantona), poduzima zakonom određene mjere u pogledu istražnih radnji i gonjenja osoba za koje se sumnja da su počinile krivična djela, te vrše druge poslove određene federalnim i kantonalnim zakonom.

Član 3. (Sjedište)

Sjedište Tužilaštva se nalazi u Zenici.

Član 4. (Osnivanje)

Tužilaštvo se osniva i ukida zakonom.

Član 5. (Obilježja tužilaštva)

- (1) Tužilaštvo ima pečat u skladu sa Zakonom o pečatu Kantona Zeničko-dobojskog kantona.
- (2) Na zgradi u kojoj je smješteno Tužilaštvo mora biti istaknut naziv Tužilaštva, i Kantona.

Član 6. (Jezici i pismo)

- (1) U Tužilaštvu su u ravnopravnoj upotrebi bosanski, hrvatski i srpski jezik.
- (2) U Tužilaštvu su u ravnopravnoj upotrebi latinično i ćirilično pismo
- (3) Tužilaštvo može koristiti i ostale jezike kao sredstvo komunikacije.

DIO DRUGI – OPŠTE NADLEŽNOSTI I FUNKCIJE

Član 7. (Nadležnost)

Tužilaštvo vodi istragu i goni osobe za koje sumnja da su počinioci krivičnih djela i vrši druge poslove određene federalnim i kantonalnim zakonom.

Član 8. (Pravni osnov)

Tužilaštvo vrši svoju funkciju u skladu sa Ustavom Bosne i Hercegovine, Ustavom Federacije i Ustavom Kantona, te na osnovu zakona Bosne i Hercegovine, Federacije i Kantona.

Član 9. (Zaštita ljudskih prava)

U okviru svojih nadležnosti Tužilaštvo štiti ostvarivanje ljudskih prava i građanskih sloboda koje garantira Ustav Bosne i Hercegovine, Ustav Federacije i Ustav Kantona, kao i ostvarivanje prava i interesa pravnih osoba utvrđenih zakonom, te osigurava ustavnost i zakonitost.

Član 10. (Pravno sredstvo protiv izvršne sudske odluke)

- (1) Kad nađe da zbog povrede kantonalnog zakona ili međunarodnog ugovora postoje osnovani razlozi da upotrijebi pravno sredstvo protiv izvršne sudske odluke ili odluke donesene u upravnom ili drugom postupku, glavni kantonalni tužilac može zahtijevati da se odloži, odnosno prekine izvršenje takve odluke, ako bi njenim izvršenjem mogle nastupiti neotklonjive štetne posljedice.
- (2) Ako glavni kantonalni tužilac podnese zahtjev iz stava 1. ovog člana, odložiti će se, odnosno prekinuti će se izvršenje odluke.
- (3) Odlaganje, odnosno prekidanje izvršenja odluke traje do donošenja odluke o pravnom sredstvu glavnog kantonalnog tužioca.
- (4) Odluka o odlaganju, odnosno o prekidanju izvršenja, prestaje da važi i ako glavni kantonalni tužilac u roku od 30 dana od dana prijema odluke ne upotrijebi pravno sredstvo.

Član 11. (Prava glavnog federalnog tužioca)

- (1) U okviru svojih ovlaštenja iz člana 9. Zakona o Tužilaštvu Federacije, glavni tužilac Federacije može Tužilaštvu izdati opće ili pojedinačne obavezne instrukcije, uputstva i provesti krivičnu istragu i gonjenje pred kantonalnim i općinskim sudovima, kad opravdano vjeruje da Tužilaštvo nije primijenilo

odredbe Krivičnog zakona Federacije ili da Tužilaštvo u svojoj nadležnosti ne može efikasno goniti osobe za koje smatra da su počinile krivično djelo.

- (2) Glavni tužilac Federacije može prenijeti određene predmete ili mjere koje spadaju u nadležnost Tužilaštva na drugo tužilaštvo.
- (3) Glavni tužilac Federacije može bez obzira na nadležnosti Tužilaštva, može povjeriti i pojedinačne predmete glavnom tužiocu, zamjeniku, odnosno zamjenicima glavnog tužioca, tužiocu Federacije, odnosno tužiocima ili tužiocu, odnosno tužiocima Tužilaštva.

Član 12.

(Obavljanje funkcije Tužilaštva)

- (1) Funkciju Tužilaštva obavlja glavni kantonalni tužilac (u daljem tekstu: glavni tužilac) i zamjenici glavnog kantonalnog tužioca (u daljem tekstu: zamjenici glavnog tužioca) i kantonalni tužiocu (u daljem tekstu: tužiocu).
- (2) Glavnog tužioca, zamjenike glavnog tužioca i tužioce bira i imenuje Visoko sudsko i tužilačko vijeće Bosne i Hercegovine (u daljem tekstu: Visoko sudsko i tužilačko vijeće).
- (3) Glavni tužilac ima najviše dva zamjenika.
- (4) Broj zamjenika glavnog tužioca i broj tužilaca određuje Visoko sudsko i tužilačko vijeće.
- (5) Ako glavni tužilac ima dva zamjenika, Visoko sudsko i tužilačko vijeće, imenuje jednog od dva zamjenika za prvog zamjenika glavnog tužioca.

Član 13.

(Prava i dužnosti glavnog tužioca)

- (1) Pravo i dužnost glavnog tužioca je da izda opće i pojedinačne instrukcije i uputstva zamjenicima glavnog tužioca i tužiocima u vezi s njihovim radom.
- (2) Pored toga glavni tužilac može:
 - a) poduzeti određene mjere iz nadležnosti zamjenika glavnog tužioca, odnosno tužilaca, ili tužioca, odnosno tužilaca;
 - b) ovlastiti drugog zamjenika, odnosno zamjenike glavnog tužioca ili tužioca, odnosno tužioce da procesuiraju određene slučajeve iz nadležnosti drugog, odnosno drugih zamjenika glavnog tužioca ili tužioca, odnosno tužilaca; i
 - c) ovlastiti zamjenika glavnog tužioca, odnosno zamjenike ili tužioca, odnosno tužioce da vrše posebne aktivnosti koje su u nadležnosti drugog, odnosno drugih zamjenika glavnog tužioca ili drugog tužioca, odnosno tužilaca.

Član 14.

(Plan rada Tužilaštva)

- (1) Glavni tužilac rukovodi Tužilaštvom. Glavni tužilac izdaje opće i pojedinačne obavezujuće instrukcije i uputstva za rad tužilačkim i administrativnim odjelima Tužilaštva.

- (2) Na početku svake godine glavni tužilac, po prethodnom mišljenju Kolegija tužilaca, donosi Plan rada Tužilaštva sa preciziranim strateškim ciljevima i ciljanim rezultatima koje Tužilaštvo treba ostvariti u tekućoj godini.
- (3) Plan rada Tužilaštva iz stava (2) ovog člana usaglašen je sa strateškim okvirom i ciljevima za Tužilački sistem Federacije Bosne i Hercegovine Federalnog tužilaštva.
- (4) Izvještaj o realizaciji Plana rada Tužilaštvo priprema do kraja januara naredne godine i isti podnosi Federalnom tužilaštvu i Visokom sudskom i tužilačkom vijeću

Član 15.
(Instrukcije i uputstva)

- (1) U smislu ovog Zakona opće i pojedinačne obavezujuće instrukcije i uputstva znače instrukcije opće prirode vezane za rad i aktivnosti zamjenika glavnog tužioca i tužilaca, kao i pojedinačna uputstva za postupanje i poduzimanje mjera i radnji u konkretnim predmetima.
- (2) Glavni tužilac izdaje opće i pojedinačne obavezne instrukcije i uputstva u skladu sa Pravilnikom o unutrašnjoj organizaciji i poslovanju.

Član 16.
(Kolegij tužilaca)

Kantonalni kolegij tužilaca sastoji se od glavnog tužioca, zamjenika glavnog tužioca i tužilaca.

Član 17
(Upućivanje u drugo tužilaštvo)

- (1) Glavni tužilac, zamjenik glavnog tužioca i tužilac mogu biti privremeno upućeni u drugo kantonalno tužilaštvo ili Tužilaštvo Federacije, bez njihovog pristanka, na period do najviše šest mjeseci unutar vremenskog roka od 5 godina.
- (2) Glavni tužilac Federacije donosi odluku o privremenom premještanju i o tome obavještava Visoko sudsko i tužilačko vijeće.
- (3) Glavni tužilac, zamjenik glavnog tužioca, odnosno tužilac koji je dodijeljen drugom tužilaštvu ili Tužilaštvu Federacije ima pravo na plaću, naknade i druga zakonom utvrđena primanja.

Član 18.
(Oslobađanje od odgovornosti)

Glavni tužilac, zamjenici glavnog tužioca i tužioci ne mogu biti pozvani na krivičnu ili građansko-pravnu odgovornost ni za jedno djelo učinjeno tokom obavljanja svojih službenih dužnosti.

Član 19.
(Odgovornost za štetu)

- (1) Kanton odgovara za štetu koju glavni tužilac, zamjenici glavnog tužioca ili tužioci nanesu građaninu ili pravnom licu tokom obavljanja svojih dužnosti nepropisnim ili nezakonitim radom.
- (2) Kanton može zahtijevati da glavni tužilac, zamjenici glavnog tužioca ili tužioci izvrše naknadu plaćenog iznosa za štetu samo ukoliko je šteta prouzrokovana namjerno ili iz krajnje nepažnje.
- (3) Zahtjev za naknadu štete iz stava 2. ovog člana zastarijeva u roku od šest mjeseci od dana prvobitno isplaćene naknade.

Član 20.
(Mandat)

- (1) Mandat glavnog tužioca i zamjenika glavnog tužioca traje pet godina, nakon čega mogu biti ponovo imenovani. Mandat prestaje u slučaju ostavke, navršenja starosne dobi propisane za odlazak u penziju po sili zakona ili smjenjivanja s dužnosti iz utvrđenih razloga. Po isteku mandata, glavni tužilac i zamjenik glavnog tužioca nastavljaju obavljati dužnosti tužioca.
- (2) Funkcija tužilaca je stalna. Njihov mandat prestaje u slučaju ostavke, navršenja starosne dobi propisane za odlazak u penziju po sili zakona ili smjenjivanja s dužnosti iz utvrđenih razloga.

Član 21.
(Legitimacija i toga)

- (1) Glavni tužilac, zamjenici glavnog tužioca i tužioci imaju službenu legitimaciju i togu.
- (2) Ministar pravosuđa i uprave Kantona (u daljem tekstu: Ministar) propisuje pravilnikom obrasce, izgled i način izdavanja službene legitimacije.
- (3) Za vrijeme dok učestvuju u postupku suđenja, a po potrebi i u svečanim prilikama po odluci glavnog tužioca, svi tužioci su obavezni da nose togu.
- (4) Visoko sudsko i tužilačko vijeće BiH propisuje korištenje i izgled tužilačke toge, koje Ministarstvo obezbjeđuje za potrebe rada tužilaca po pismenom zahtjevu Tužilaštva

DIO TREĆI - ORGANIZACIJA I RAD

Član 22.
(Organizacija)

- (1) Tužilaštvo se uspostavlja sa jurisdikcijom za cijelu teritoriju Kantona.
- (2) Na prijedlog glavnog tužioca i nakon što sasluša glavnog tužioca Federacije i Vladu Kantona, Visoko sudsko i tužilačko vijeće odlučuje o uspostavljanju ili prestanku rada područnih tužilaštava Tužilaštava u općinama Kantona.
- (3) Područna tužilaštva se mogu uspostaviti samo ukoliko postoji opravdana i neophodna potreba za takvim područnim tužilaštvom, kako bi se zagarantirala efikasnost provođenja krivičnog postupka.

- (4) Kantonalna tužilaštva i područna tužilaštva predstavljaju jedinstveno organizaciono tijelo.

Član 23.

(Postupanje pred sudovima kantona)

U ispunjavanju svoje funkcije Tužilaštvo učestvuje u postupcima pred Kantonalnim i općinskim sudovima Kantona.

Član 24.

(Zamjena glavnog tužioca i zamjenika glavnog tužioca)

- (1) Kada je glavni tužilac odsutan ili spriječen, mijenja ga (prvi) zamjenik glavnog tužioca, a zatim zamjenik glavnog tužioca, ukoliko je isti imenovan. U slučaju kada su glavni tužilac i njegov zamjenik, odnosno zamjenici odsutni ili spriječeni, tužilac koji ima najduže radno iskustvo vrši funkciju privremenog glavnog tužioca.
- (2) Ukoliko su glavni tužilac i njegovi zamjenici odsutni ili spriječeni duže od jednog mjeseca, glavni tužilac Federacije određuje vršioca dužnosti glavnog tužioca, za period ne duži od šest mjeseci. Po isteku ovog perioda glavni tužilac Federacije obavještava Visoko sudsko i tužilačko vijeće o upražnjenom mjestu u Tužilaštvu, koje potom može objaviti oglas za popunjavanje ovog radnog mjesta.

DIO ČETVRTI – IZVJEŠTAVANJE

Član 25.

(Izveštavanja u Tužilaštvu)

- (1) Rad Tužilaštva nadzire glavni tužilac Federacije s ciljem osiguravanja zakonitosti i efikasnosti postupaka.
- (2) Na zahtjev glavnog tužioca Federacije, glavni tužilac dostavlja izvještaje o pojedinim predmetima, s detaljnim opisom mjera koje poduzima Tužilaštvo.
- (3) Glavni tužilac redovno, a najmanje jednom u šest mjeseci, Tužilaštvu Federacije podnosi izvještaje o stanju kriminaliteta i rješavanju predmeta.

Član 26.

(Izveštavanje kantonalne skupštine i vlade)

- (1) Na kraju svake kalendarske godine, glavni tužilac priprema Godišnji izvještaj o radu Tužilaštva sa statističkim pregledom aktivnosti Tužilaštva koje se odnose na:

- a. broj prenesenih (neriješenih) prijava i istraga
 - b. broj primljenih predmeta tokom tekuće godine
 - c. riješene i neriješene prijave i istrage
 - d. broj podignutih optužnica
 - e. broj tužilačkih odluka o neprovođenju i obustavi istrage
 - f. broj i vrstu sudskih odluka
 - g. druge značajne statističke podatke o radu Tužilaštva u izvještajnoj godini u skladu sa uputstvom i aktima Visokog sudskog i tužilačkog vijeća
- (2) Na kraju svake kalendarske godine Glavni tužilac podnosi Skupštini Zeničko-dobojskog kantona i Vladi Zeničko-dobojskog kantona Godišnji izvještaj sa pregledom statističkih podataka u izvještajnoj godini. Glavni tužilac može u svojim zaključcima dati prijedloge da se izvrši reforma zakona.
 - (3) Glavni tužilac dostavlja glavnom federalnom tužiocu potrebne podatke za potrebe izrade Godišnjeg izvještaja i pripremu analiza i planova rada za sva tužilaštva Federacije.
 - (4) Jedan primjerak Godišnjeg izvještaja iz stava (2) ovog člana Tužilaštvo dostavlja Ministarstvu za pravosuđe i upravu Zeničko-dobojskog kantona (u daljnjem tekstu: Ministarstvo), koje analizira izvještaj i isti s prijedlogom zaključaka, dostavlja Skupštini putem Vlade Kantona.
 - (5) Godišnji izvještaj Tužilaštva Skupština razmatra na sjednici i prima na znanje.

Član 27.

(Obavještavanje javnosti)

- (1) Tužilaštvo može obavještavati javnost i odgovarajuće organe vlasti i organizacije, putem sredstava informisanja ili drugim putem o stanju kriminaliteta u Kantonu.
- (2) U okviru djelokruga rada utvrđenog zakonom i u skladu sa interesima postupka, Tužilaštvo može obavještavati javnost o pojedinim predmetima krivičnog gonjenja ukoliko su te informacije od interesa za javnost.
- (3) U postupku obavještavanja javnosti, Tužilaštvo se rukovodi interesima pravednosti, imajući na umu standarde navedene u članu 6. (1) Evropske konvencije o zaštiti ljudskih prava i osnovnih sloboda, kao i odredbe propisa o slobodi pristupa informacijama u Federaciji Bosne i Hercegovine.

Član 28.

(Praćenje stanja u praksi)

- (1) Tužilaštvo prati i analizira probleme u tužilačkoj praksi Kantona, koji su od važnosti za provođenje krivičnog zakonodavstva.
- (2) O pitanjima iz djelokruga Tužilaštva Federacije i Tužilaštva koja su od važnosti za provođenje Krivičnog zakona Federacije, glavni tužilac Federacije i glavni tužilac mogu zauzimati zajedničke stavove na sastancima koje saziva glavni tužilac Federacije na vlastitu inicijativu ili na prijedlog glavnog tužioca.

DIO PETI - UNUTRAŠNJA ORGANIZACIJA TUŽILAŠTVA

Član 29.

(Pravilnik o unutrašnjoj organizaciji i poslovanju)

- (1) Pravilnikom o unutrašnjoj organizaciji i poslovanju (u daljem tekstu: Pravilnik) se, inter alia, uređuje organizacija Tužilaštva, broj administrativno-tehničkog osoblja, te uvjeti za obavljanje tih poslova.
- (2) Pravilnik Tužilaštva donosi glavni tužilac, po odobrenju Kolegija tužilaca i Visokog sudskog i tužilačkog vijeća.
- (3) Glavni tužilac u okviru poslova rukovođenja Upravom Tužilaštva, u saradnji sa Sekretarom Tužilaštva, donosi potrebne pravilnike, procedure i uputstva, te druge interne propise i akte kojima se detaljnije regulišu poslovi uprave, kao i obaveze i zadaci državnih službenika i namještenika u Tužilaštvu

Član 30.

(Sekretar tužilaštva)

- (1) Tužilaštvo ima Sekretara Tužilaštva (dalje: sekretar) kojeg u skladu sa Zakonom o državnoj službi u Federaciji Bosne i Hercegovine postavlja glavni tužilac.
- (2) Sekretar obavlja poslove od značaja za unutrašnju organizaciju Tužilaštva i ostale poslove u skladu sa Zakonom o državnoj službi u Federaciji Bosne i Hercegovine, podzakonskim aktima, te pomaže glavnom tužiocu u rukovođenju Upravom Tužilaštva, pripremi Godišnjeg izvještaja, Plana rada Tužilaštva i izvještaja o njegovoj realizaciji.
- (3) Sekretar pomaže glavnom tužiocu u pripremi budžeta Tužilaštva.

Član 31.

(Evidencija)

- (1) Tužilaštvo vodi evidenciju o predmetima u Sistemu za automatsko upravljanje predmetima u tužilaštvima u skladu sa sa Priručnikom i uputstvima Visokog sudskog i tužilačkog vijeća .
- (2) Zaprimljene predmete Tužilaštvo registrira navodeći, između ostalog, slijedeće podatke, ukoliko su mu oni poznati:
 - a) ime i prezime osobe protiv koje je podnijeta krivična prijava;
 - b) državljanstvo osobe protiv koje podnijeta krivična prijava;
 - c) adresa osobe protiv koje je podnijeta krivična prijava;
 - d) datum kada je počinjeno krivično djelo;
 - e) pravni karakter krivičnog djela;
 - f) odgovarajuće odredbe Krivičnog zakona;
 - g) broj dosjea u Tužilaštvu;
 - h) dosje pod kojim je predmet zavela institucija za provedbu zakona;
 - i) datum uvođenja predmeta u evidenciju Tužilaštva.

Član 32.
(Pripravnici)

- (1) Državljanin Bosne i Hercegovine koji je diplomirani pravnik i koji ispunjava opće uvjete za zapošljavanje u organima vlasti može biti zaposlen kao pripravnik.
- (2) Pripravnici se zapošljavaju u Tužilaštvu i postepeno im se dodjeljuju sve vrste poslova kako bi stekli praktična iskustva u svim oblastima rada Tužilaštva.
- (3) Pripravnici se upošljavaju na određeno vrijeme na period od najviše dvije godine.
- (4) Tokom pripravničkog staža, pripravnici se upućuju na praktičan rad u općinske i kantonalni sud.
- (5) Dužina trajanja praktičnog rada pripravnika, uvjeti za stjecanje prava na polaganje pravosudnog ispita, te program i način polaganja pravosudnog ispita regulišu se posebnim propisom.

Član 33.
(Propisi o stusnim pitanjima)

Posebnim propisima kojima se regulišu funkcije, prava i dužnosti uposlenika u kantonalnim organima vlasti odnose se i na uposlenike u Tužilaštvu, osim ukoliko to nije drugačije utvrđeno ovim ili drugim zakonom.

DIO ŠESTI - FINANSIRANJE TUŽILAŠTVA

Član 34.
(Budžet)

- (1) Tužilaštvo ima svoj budžet koji je sastavni dio kantonalnog budžeta.
- (2) Prije početka budžetske godine glavni tužilac priprema prijedlog budžeta i isti dostavlja Ministarstvu, na dalju proceduru usklađivanja i usvajanja od strane Skupštine Kantona, te Visokom sudskom i tužilačkom vijeću, radi davanja mišljenja i podrške kod Vlade i Skupštine Kantona.
- (3) Glavni tužilac može da prisustvuje sjednicama Skupštine Kantona i njenih stručnih komisija kada se na sjednicama razgovara ili odlučuje o budžetskim pitanjima koja se odnose na Tužilaštvo.
- (4) Glavnom tužiocu u pripremi budžeta pomaže sekretar Tužilaštva
- (5) Na kraju svake budžetske godine glavni tužilac, putem Ministarstva, obavještava Skupštinu Kantona o realizaciji budžeta Tužilaštva.

Član 35.
(Plata tužioca)

Glavni tužilac, zamjenici glavnog tužioca i tužioci imaju pravo na platu i druge naknade definirane posebnim zakonom.

DIO SEDMI - PRIJELAZNE I ZAVRŠNE ODREDBE

Član 37.
(Prestanak važenja zakona)

Danom stupanja na snagu ovog zakona prestaje važiti Zakon o Tužilaštvu Zeničko-dobojskog kantona («Sužbene novine Zeničko-dobojskog kantona, br. 4/97 i 11/07)

Član 38.
(Stupanje na snagu zakona)

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

PREDSJEDAVAJUĆI

Jasmin Duvnjak